

四庫全書

集部

欽定四庫全書

乾坤清氣卷三

明 偶桓 編

七言古詩

鄧州城樓

元好問裕之

鄧州城下湍水流
鄧州城隅多古丘
隆中布衣不復見
浮雲西北空悠悠
長鯨駕空海波立
老鶴叫月蒼煙愁
自古江山感遊子
令人誰解賦登樓

金太子允恭墨竹

劉因夢吉

黑龍江頭氣鬱蔥
武皇射龍江水中
江聲怒號久不瀉
破墨揮洒餘神功
天人與竹皆真龍
墨竹以來凡馬空
人間只有墨君堂
何曾夢到瓊華宮
瑤光樓前月如練
倒影自有河山雄
金源大定始全盛
時以漢文當世宗
興陵為父明昌子
樂事孰與東宮同
文米不隨焦土盡
風節直與幽蘭崇
百年圖籍有蕭相
一代英雄惟蔡公
策書紛紛少顏色
空山夜哭遺山翁
我亦飄零感白髮

哀歌對此吟雙蓬秋聲蕭蕭來晚風極目海角天無窮

宋理宗書宮扇

杭州宮扇二好事者得之燕市一畫雪夜泛
舟一畫二色菊理宗題其背有興盡為期及
晚節寒香之句諸公賦詩予亦同作

天津月明啼杜鵑梁園春色凝寒煙傷心莫說靖康前
吳山又到繁華年繁華幾時春已換千秋萬古合歡扇
銅雀香消見墨痕秋去秋來幾恩怨一聲白鴈更西風

冠蓋散為煙霧空百錢襪錦天留在禍胎更鑑驪山宮
當時夢裏金銀闕百子樓前無六月瓊枝秀發後庭春
珠簾晴卷天門雪棹歌一曲白雲秋不覺金人淚暗流
乾坤幾度青城月扇影無情也解愁五雲回首燕山北
燕山雪花大如席雪花漫漫水戕戕大風起兮奈爾何

西山

西山龍蟠幾千里力盡西風吹不起夜來赤脚踏蒼鱗
一著神鞭上箕尾天風泠泠清入肌醉抱明月人間歸

嫦娥洒淚不敢語
銀河鼓浪需人衣
寄謝君平莫饒舌
袖中此物無人知

觀雷溪

飛狐天下脊老氣盤互回三江瀉天怒合為一水東南
來此勢不殺令人愁石門喜見西山開未補青天裂誰
鑿混沌胎奇聲猛狀萬萬古山根幾許猶崔巍兩山倒
傾瀾百丈逢顛崖先聲動毛髮餘爽開襟懷初疑萬壑
轉奔石意像彷彿地軸摧又疑鼓角鳴地中百步未到

仍徘徊荒祠下石磴駭目何雄哉春風不到太古雪今
日乃得胸中雷穿石誰能窮窟宅流沫勢欲浮蓬萊平
生芥蒂今寒灰兩耳到骨無纖埃酈元筆頭天下水石
頭之奇猶見推乃知茲游亦奇絕快弄素霓噴瓊瑰東
崖一片石坐拂千年苔為招郎山君共卷長鯨杯江妃
為撾靈鼓催赤鯁躍出銀山堆先生醉來泉洒面狂歌
一和湍聲哀

遊郎山

昨日山東州馬耳索御凌風嘶今日軍市中不覺已落
山之西山之面背一無異不待風煙變化神已迷危闕
度雪嶺亂石通荒蹊林間小草不識風日自太古我行
終日仰羨木杪幽禽啼但見雨色來雲物颯以淒忽然
長嘯得石頂痛快如御駿馬蹄萬里來長風五色開晴
霓長劍倚天立皎潔瑩鷲鵝平地拔起不傾側物外想
有神物提詩家舊品蒿少同畫圖省見巫山低誰令九
華名獨與八柱齊千態萬狀天不知敢以兩目窮端倪

騫騰誰避若飛隼側瞰何屈如怒猊千年落窮邊煙草
寒萋萋若非鄴亭書生此鄉國物色誰省曾分題乾坤
至寶會有待豈有江山如此不著幽人棲頗聞山中人
雲間時間大與鷄只疑名山別有靈境在不許塵世窮
攀躋不是先生南游有成約徑欲共把白雲犁九疑窺
衡湘禹穴探會稽玉井爛賞金芙蓉日觀倒卷青玻璃
風煙回首莫瀟洒南游準擬相招攜

書李伯時九歌圖後

吳澄幼清

李家畫手入神品
楚賢流風清凜凜
誰遣巫陽叫帝閭
為招江上歸來魂
音紛紛柱高辰遠
聰不聞扶桑初瞰
海橫雲司命描物
泥在釣洪纖厚薄
無齊雲公無渡公
無渡衝風起螭龜
怒夜猿啾啾天欲
雨天欲雨迷歸路
歲晏山中采蘭杜
靈修顧顧復去莫
怨瑤臺神女妬坎
坎鼓進芳醕耻作
蠻巫小腰舞千年
往事今如新摩挲
舊畫空愴神騰身
輕舉一回首楚天
萬里江湖春

送孟仲則游荆湖兼往襄漢 趙孟頫子昂

行路方難子何往
瀟湘洞庭天一方
長江風來浪如雪
荆門木落天雨霜
千金養客不復見
萬里訪舊庸何傷
子才有用未得試
牛刀愛惜藏鋒芒
似聞遠遊未渠央
更欲攬轡趨襄陽
昔年戰鬪且休息
白骨已瘞愁雲黃
伏龍鳳雛在何處
鹿門山色還蒼蒼
登高弔古一長嘯
萬事慘淡悲衷腸
人生聚散安可常
為君起舞君舉觴
明朝帆影拂浮玉
寄言客居思故鄉

小孤山阻風

梁曾貢父

江上青山一劍孤，氣虹夜貫斗牛墟。
寒藤古祠神所居，謾說彭郎迎小姑。
此言不經聽者愚，舉世孰謂明言誣。
山下長江通蜀吳，飛廉怒鎖千軸艫。
乾坤變色慘不舒，竿摧櫓折愁萬夫。
初疑破虜遇老狐，又訝伏波留賈胡。
陽侯負弩雄前驅，馮夷擊鼓嚴後車。
六鰲掣釣軒蓬壺，八駿按轡鞭龍魚。
神靈怪駭千萬殊，縱有健筆難窮書。
一官長沙賦歸歟，三年卧病南陽廬。
故交新貴一字無。

扁舟薄泛松江鱸行或止之不可虞呼童取酒聊自娛
短歌激烈驚樵漁掀髯一笑誰和予隣商去住依祝巫
盤食拜飼檣上烏百錢之利從所趨浪走不待晨鷄呼
進銳退速中乘除未要冒險爭前途江山政自不我疎
我亦樂與江山俱安得匹素百尺餘他年寫與東游圖

岳陽樓

張經德常

洞庭一水七百里煙朝月夕皆經過豈知斜陽萬里更
有一佳處君山十二盤青螺乾坤有此樓萬古高嵯峨

憶昨長江咫尺限南北風煙畫本一日千摩挲今朝快
一登恍若驅沉疴生平所羨鑑湖請乃今更覺君恩多
湘靈也似知我至時令白鳥來婆娑錢笛紫荊曲春草
黃陵歌江山一醉謾不省悲風落日生白波愛山愛水
亦非癖奈此日月如飛梭彭蠡銀山堆碧海青銅磨武
昌雲間歎黃鶴采石天外愁青蛾詩家割據幾今古元
氣發泄天不訶扁舟歸來月一蓑仙槎已候三山阿吾
欲乘興觀銀河

金人出塞圖

虞集伯生

海風吹沙如卷濤高為阨磧深為壕築壘其上嚴周遭
名王專居氣振豪肉食湏飲田為遨八月草白風颼颼
馬食草實輕骨毛加弦試弓復置橐今日不樂心慄慄
什什伍伍呼其曹銀黃兔鶻明綃袍鷓鴣小管隨鳴靴
背孤向虛出北臯海東之驚王不驕錦鞞金鏃紅絨條
按習久蓄思一超是時晶清天翳絕駕驚東來雲帖帖
去地萬仞天一瞥離婁屬望目力竭微如聞音驚一掣

束身直上不回折遂使孤飛一片雪頃刻平蕪洒毛血
爭誇得雋頓足悅挂兔縣狼何足說旌旗先歸向城闕
落日悲風起蕭屑煙塵滿城鼓微咽大豪要王具甘歆
王亦欣然沃焦熱闕支出迎騎小錢琵琶兩姬紅顴頰
舞歌迭進醉燭滅穹廬斜轉毘能月

三鳳行贈海東之下第南歸

海東之兄弟三人如鳳皇曾臆羽翮皆文章九年三入
天門翔仲沖天季驚人一日四海皆知名東之之文五

色雲見者眩晃生眇昏三進三已之了若耳不聞二人
得之喜未足云東之不愠乃可尊東書江上歸見親君
子之樂樂最真君不見匡廬之山嵒萃而嵯峨左界乎
豫章諸川匯為蠡番其陰千源浩浩尊岷經潛沱山氣
東鬱不得去上衝為紫蓋直與天相摩為雲覆八極為
雨漲九河海東之子能觀山以成德其進蓋未易量也
偶爾小詘奈爾何偶爾小詘奈爾何

送戴真人歸越

戴先生日飲五斗醉不得再飲一石不肯眠昨從桃源
來兩袖攜風煙長安市上小兒女拍手攔道呼神仙馬
如游龍花如雨蹴蹋春秋作朝莫東方不作牕間戲上
帝還令海邊去海邊玉虹夜不收貝宮珠闕皆蛟虬芝
田玉樹久相待天上老仙那許留戴先生鑑湖之水三
千丈不可以鑑可以釀明朝亦脫錦袍去與爾酣歌釣
船上

家兄孟修父輸賦京師南還

大兄五月來作客十年不見頭搥白五人兄弟四人在
每憶中郎淚沾臆我家蜀西忠孝門無田無宅惟書存
兄雖管庫寔父蔭弟竊微祿承君恩文章不如仲氏好
叔氏最少今亦老五郎十歲未知學嗟我胡為長遠道
諸兒讀書苦不多又不力耕將奈何憂來每得二三友
看花把酒臨風歌蜀山嵯峨歸未得盤盤先隴臨川側
碧梧翠竹手自移應與青松各千尺南風吹雪河始冰
兄歸烏帽何煒煒明年乞身向天子共讀父書歌太平

題張令鹿門圖

張侯襄陽人深知襄陽樂十年宦學懷襄陽故託豪鯁
寫山郭老我不樂思蜀郡人言嵩陽好隱居三十六峯
常對面水竹田廬還可圖欲往不能心惴惴忽見新圖
被山惱沙禽浦樹俱可人金澗石床為誰好向來耆舊
皆英雄駕言從之道焉從美珠夜冷識游女沉劍潭深
知卧龍八月霜晴水清淺聞道扁舟足回轉何時古寺
傍檀溪幾度殘碑在江峴呼鷹臺高秋草多養魚池中

蓮芡波蜀嵩未必不如此我今不游奈老何張侯張侯
早結屋莫待史詹為君卜要看壘上課兒畊好在魚梁
白沙曲

題楊友直檢校所藏李營丘枯木圖

老龍出海蒼髯鬚營丘枯木天下無回枝屈鐵墮厓雪
澗底應拾青珊瑚明堂清廟要梁棟朔風吹沙澤腹凍
老身不用歎衰遲按圖來求萬鈞重

己未行

范梈德機

二年六月己未朔京城五更大地作卧者顛衣起若吹
起者環庭眩相愕室宇無波上下搖乾坤有位東西却
自我南來覩再震初震依微不今若昨朝展席坐堂上
耽翫圖書靜無覺堂下羣兒又驚報方饌饗人喪盃勺
櫛者倉皇下床榻門屋鏗鏘震鈴鐸祇今猶自騰妖譌
旦莫殊言共邪郭大家夜卧張廬穹小家露坐瞻星落
焉知怪變不可屢安巢盡有南飛鵲昔聞上帝憂瀛洲
親勅巨鯨十二頭特為羣臣舉首戴萬古不與水東流

豈其九州亦類此
此事或誕或有由
上帝甚神吾甚愚
戴者勿動心優游

孟先生

孟先生愛青山
看山累月出不還
寒驢長笑天地間
杖頭酒壺時取酌
身雖飢病多容顏
往時佳句動明主
富有聲名無比數
先生遇之亦不驚
去卧南山紫蘿雨
嗟吾豈是先生徒
朝朝飽飯謁禁廬
莫歸却向衡門趨
刻畫造化論錨銖
但有千載名衆人
不知而已獨信非

愚未知吾師先生先生師吾孔子不師周公吾亦聊自
以娛嗟哉先生獨不得相與于同世雲龍上下游八區

題先天觀圖

學仙之人與仙為徒住在匡廬之與湖江之區張公煉
丹作龍虎丹成御氣游六虛後來出者絕代無何不學
仙住玄都玄都之壇角井孤上摩萬里之黃鵠下伏千
尺之飢飈陰森檜筠自太古斬種力與開闢俱扶桑朝
日挂絕壁坐見樓觀青模糊壁崖控石瀉哀湍春秋雲

露芝田腴我亦人間山澤癯偶陪夔龍賓唐虞有時一
醉黃公壚震風三日撼不蘇折花未得渡弱水揮手始
識仙凡殊玉堂學士元與吳遺我茲山之畫圖尋牕數
戶久嘆息無因致我雙携蒲獨行幽人不受呼掃葉青
澗聽啼鳥日暮蘿徑相縈紆相縈紆向何處明朝為借
麻姑鵬我亦騎之上天去

奉和翰林侍講學士鄧善之韻

曩承持節江之東騎鯨再上蓬萊宮蓬萊仙人歌白鶴

聲落五湖煙雨中世間爵祿不易致何獨去就如飄風
朝廷禮樂須制作六經隱義資發蒙論思廟堂集耆碩
啟沃寧讓前諸公閉門讀書古都市四輦冠蓋方隆隆
我生生長在空谷那有文字爭人雄謬蒙引譽百寮上
負祿府署慚無功一別十年還又五昔者少壯今成翁
誰知復客七閩下隔二千里來詩筒羸軀頓醒瘴癘惡
賴此以慰心忡忡越王城南浪自白越王城西花正紅

搗練圖

深宮佳人白日長夜感蟋蟀鳴中堂起視河漢心回徨
雲鬢籠鬆分作行清水如天收素練翠娥帶月杵玄霜
輓轡無繩金井悄邊頭不見梧桐黃裁縫熨帖坐在床
載玄載黃公子裳製成不遠煩寄將但見寒暑週三光
身體甚適時平康君不見古來邊庭士雪壓關河征戰
多折盡衣裘淚如水

夏五月武昌舟中觸目

揭傒斯曼碩

兩髯背立鳴雙櫓短蓑開合滄江雨青山如龍入雲去

白髮何人並沙語船頭放歌船尾和蓬上雨鳴篷下坐
推篷不省是何鄉但見雙雙白鷗過

送趙履道虞叔常還江左

趙子我同里虞郎我同年手折武昌柳送上西江船買
魚沽酒燒荻鞭夜下西塞寒山前西塞山碧如苔君今
去幾時來東風花開春水漲待君黃鸝磯頭望君庾公
樓上

夢兩雛

阿英十二能辟繯阿牛五歲貪讀書辟繯成縷無人織
讀書有志令人惜汝父飄零汝母休吾親雖健俱白頭
雨聲斷道風驚屋阿婆獨抱諸孫哭

大信晚泊呈舟中諸公

千家楊柳江當門東梁西梁兩岸蹲連檣大船集日昏
撻金伐鼓海上聞小江更出采石後前人立功後人守
大信花采石酒陌上相逢莫回首

題陳所翁雙龍圖

愛龍畫擘玄淵開萬物顛倒隨雲雷龍公被髮向空下
身是真龍非畫者錢作鬚鬣玉作鱗電出兩目雲繞身
偶然會合此何處仰面向天天不嗔世間眩轉空形影
倏然變化那能省高僧說法夜來聽誰道相逢非夢境
斗牛蒼蒼風雨莫泉阿豈識延平路當時縱無雷煥與
張華未必終藏不飛去

題捕魚圖

歐陽玄元功

太湖三萬六千頃靈槎倒壓青天影大魚吹浪高如山

小魚卷鬣為龍盤羣魚聯艘伐枻鼓勢同三軍戰彊虜
長網大罟三百尺欄截中流若環堵吳王宮中宴未闌
銀絲所膾飛龍鸞大官八珍奉公子猩猩頰唇鯉魚尾
洞庭木落天南秋黃蘆滿天飛白鷗江頭吹笛喚漁舟
與君大醉岳陽樓

送時中兄入京

楊載仲弘

先生意氣非常流有如鵬鶚厲九秋讀書不肯守章句
經濟可許斯人儔懷抱利器將遠游直往上國交公侯

王侯位高不下士如以蛟龍視螻蟻為君莫獻光範書
以氣撼搖差可耳功名倘來不足為丈夫須作遠大期
君不見麒麟閣上圖英俊當時或自閭閻奮

次韻虞彥高游陽明洞

憶昔神禹奠九州茲山會計功始休諸侯玉帛渺何許
但見萬水從東流衣冠永閉陽明洞夜聞鬼哭巖之幽
珠宮貝闕號龍瑞天造地設非人謀又牙怪樹凍不死
化作千丈蒼玉虬丹洞呀然仙掌裂翠峯巧笑蛾眉修

梅梁飛去鍊鎖斷往往雷雨生靈湫軒轅候神極秘怪
海上笙鶴時相投平生閉門讀史記子乃探穴先吾游
明當挾子期汗漫題詩更上最上頭不妨山水樂吾樂
豈有飢渴憂民憂故家喬木尚可求有子有孫百世留
卧橫玉簫泛歸舟吹散萬斛江南愁

吳真人古劍歌

閒閒真人藏古劍敬之如神不敢忽賓客時來求一觀
輒有悲風起倉卒人言此是金鐵精良工煅煉久始成

動搖天地含變化摩蕩日月含光精昔年有蛟起江中
口吐烈焰燒長空下民昏溺上帝怒雷電往擊皆無功
常持此劍斬蛟首流血滔滔侵廬阜傳記傳聞時既久
不意世間今尚有吾過下里多惡氛魍魎魍魎能食人
請君為我絕此怪一洗宇宙長清新

題華岳江城圖

華岳能詩世有名學畫丹青亦豪放此圖似寫安慶城
雉堞樓臺儼相向北風將至江面黑千艘萬艘爭避匿

滄溟湧溢水倒流南岳動搖天柱側蛟龍戲落秋潭底
素練平鋪八千里時清好作釣魚翁閒弄輕舟煙霧裏

過黃陵廟

李材子構

黃陵廟前湘水綠天寒漁郎唱巴曲沙棠舟上月蒼蒼
翠蛟白蜃江茫茫似聞清怨五十柱萬里鴻飛楓葉暮
神雅翻舞洞門開珠裳玉袖霑莓苔玄猿晝啼薜蘿影
赤鱗夜去芙蓉冷北渚淚痕斑竹紋南風哀思蒼梧雲
山頭古桂秋露碧山下江流豈終極荒涼揭車雜杜蘅

靈風自吹煙霧旌輕帆晚向芳洲泊聊薦蘋羞奠蘭酌
沅有汜兮湘有沱洞庭木落生層波徘徊獨詠騷人歌

乾坤清氣卷三

欽定四庫全書

乾坤清氣卷四

明 偶桓 編

七言古詩

送華山隱歸西湖

王士熙繼學

方士求仙入滄海十二城樓定何在金銅移盤露滿天
琪樹離離人不采軒轅高拱聖明居羣仙真人左右趨
青牛谷口迎紫氣白鶴洞中傳素書珊珊鳴珮星辰遠

寂寂珠庭雲霧虛修髯如漆古仙子玉林芙蓉染秋水
九關高塞不可留歸去江湖種蘭芷山頭宮殿風玲瓏
玄猿飛來千尺松閒房誦經鐘磬響石壁題詩苔蘚封
欲向君王乞祠祿安排杖履來相從

送蘇公赴嶺北行省郎中

居庸關頭亂山積李陵臺西白沙磧畫省郎中貂帽側
飛雪皚皚馬韁濕馬蹄雪深遲遲行冷月淒雲塞垣明
鍬甲無光烽不驚萬營角聲如水平明年四月新草生

征人賣劍龍頭舛思君遙遙隔高城南風城頭來鴈鳴
贈廣東憲史張漢英之南臺掾

生平不願為傭書亦不願作章句儒酒酣詩成吐素霓
意氣凜凜吞千夫前年排雲叫閭闔出門一夜車四角
去年海嶠席未溫一舸乘潮又催發大江之西日本東
廬陵文物常稱雄決科歲占十八九君當努力提詞鋒
才高不用長嘆息四海彌天豈無識壯年懷居亦何有
著眼帶礪開胸臆巖巖柏府凌高寒豪士傾蓋宜交歡

我知屠龍不屠豨食馬政欲食馬肝吳姬壓酒飄香絮
謫仙神游歌白紵敬亭惟有孤雲閒欲雨人間亦飛去

離京夜抵潞陽賦詩遥慰匡廬隱者併以寄金

門諸公為一喙云

李沔溉之

野馬脫羈鞅倏疑天地寬臨風一長鳴風吹散入青冥
間頗如魯仲連蹈海不復還又如安期生長留一舄令
人看江南浩蕩忽如海落日照耀浮雲闕既不能低眉
伏氣推心顏詭遇特達驚冥頑又不能抱書挾策千萬

乘調笑日月相回盤匡廬迢迢接仙山仙翁泛若秋雲
閒長松之陰引孤鶴望我不見空長歎采鉛天池津飲
醪桃花灣蒼梧倒影三湘寒赤城霞氣生微瀾鯨鯢翻
空海波赤曉色欲上扶桑難人間之樂兮誠不足恃何
如歸卧棲巖巒棲巖巒卧巖穴夜半天風吹酒醒猶有
青溪萬年月

題丁氏松澗圖

鄧文原善之

天目之峰凌紫煙下周林壑紆長川清池斗絕涵倒影

神運直自疏鑿先彼美幽貞廬閑房曲與辛夷荃蒼松
手植經幾年靈虬天矯今參天門前朝流莫流水但聞
激石瀉瀨鳴濺濺山人養真衡茅下有書可讀琴可絃
意行清澗曲長嘯松風前山月出林高山花弄春妍仙
人歌來夜將半天空鶴唳山淒然飈塵大笑狂馳子口
誦丹訣傳真玄我欲從之結隣屋待疏藥圃謀芝田

送友之官江西

胡寬則大

花間乳鶯啼曙色送客驅車上南陌陌頭芳草綠萋萋

今人古人滅行跡明發吳儂燕尾船江卷寒潮飛練白
鸞童乘月吹紫笙不似琵琶怨秋瑟滕王閣中歌舞闌
一望雲林謝公宅

題周暘明皇水中射鹿圖 雅勃呼正卿

開元天子奮神武一矢成功定寰宇飛騎營中墮牝雞
妖星散落紛如雨邇來校獵渭城東姚崇發蹤指顧中
馬前十論効驅策君王已賀獲雋功波濤瀕洞真龍立
應見波間老蛟泣畫師盤礴筆有神千載英姿如昨日

君不見天寶年來事事非
宮中行樂晝游稀
可憐野鹿銜花去
猶向樽前按舞衣

送御史王伯循之南臺

京華歲晏饒風雪
況復知交遠相別
金貂貫酒燕市傍
官柳殘條不堪折
客心戀戀不忍發
離歌莫唱陽關疊
羨君年少蚤致身
文章德業追古人
繡衣驄馬向南去
江湖草木含青春

杭州送兒姪歸里

黃潛晉卿

空江月滿潮聲怒二兒勇踏潮頭去故園天末渺予懷
夢中識汝歸來路起向江樓遙望汝江上青楓正霜露
涼風颼颼吹汝急櫓搖背指龍山渡翩然一葉舞中流
嗟汝童心得無懼自我西游歷三紀舉目交游半新故
下車相揖何紛紛白頭朝士猶徒步玄都觀裏舊桃花
見我重來能幾度緬思疇昔仍念汝徙倚闌干日將暮
前潮將斷後潮續層波複浪無重數魚龍出沒相後先
疾雷槌山雨如注隔岸巒峰空復多沙際冥濛但煙霧

計程知汝已登陸
息肩弛擔今何處
明朝過我三釜山
能勿徘徊起哀慕
近聞旱魃肆為虐
殺吾手植千株樹
且須為我語比隣
莫遣牛羊上丘墓

贈俞觀光

東牕讀書吻正悲
坐聞剝啄走啟扉
衝風踏凍至者誰
俞子訪我由剡溪
相逢把臂語移時
婦人驚笑羣兒痴
俗物疾我不可鑒
眼明求此珊瑚枝
朝來贈我天馬詩
忽然掉頭去莫羈
鼻頭氣息干虹霓
詎能折腰向小兒

文章技痒聊娛嬉策勲聖處今毋遲緊我愛子莫助之
臨岐躑躅徒嗟咨

題李坦之學道齋詩文

神仙中人世莫識政以文章為戲劇李生也復可憐人
手種蟠桃待春色山空歲寒誰念汝青楓墮影霜露白
遠游賦成一朝去翠蓋雲旗莫可適蓬萊煙霧秋冥冥
鄧君白鹿無消息袖中驪珠三百顆夜深勿近蛟龍宅
金華山高青矗天山人看山忘歲年黃精芝草幸可食

安得與子巢其顛石床醉聽松風眠無為長歌怨如哭
使汝惻愴凋朱顏

半月樓

柯九思敬仲

峨眉山色凝秋碧山下雲連鏡湖濕萬里青天月半規
十二樓頭夜吹笛滿庭桂樹仙人家玉兔擣藥來紅霞
青蓮居士下東海祇在蓬萊掃落花

跋南岳壽寧觀碑後

元明善復初

朱陵靈臺天柱巍太虛空洞綠煙扉上館赤帝朱鳥飛

祝融宅南參與旗義城兩曜愁蔽虧象緯冷逼嗟位迷
四觀燕吳與秦齊恒嵩泰華孰崇卑五氣順布百志熙
流祥阜物宣后祇雨風露雷豈其私惠爾下土尸者誰
中有異人餐玉芝夜眠秋霞晝天倪衣以青雲裳白霓
風車八極參兩螭七十二峯足幽棲琳宮貝闕輝陸離
潛光煉魄如嬰兒大丹入咽無渴飢誰其思之吳宗師
神變倏忽方張施泠然御風渺何之太君歲晏嘉予期
千秋萬歲受鴻釐皇圖景運永以丕手持芙蓉朝紫微

旋飈天闔此來歸彭靈荅旼達爾垂磨崖鐫我瑤華碑

出門別親友

陳孚剛中

停君漢水浮鴨之翠杓聽我嶧陽棲鸞之綠桐男兒拂
衣出門去龍泉三尺光如虹君不見磻溪鶴髮釣魚者
偶擲漁竿來收野白旄揮開炮烙煙桓圭朱芾侯青社
又不見南陽卧龍人不識一朝佐漢望狼石羽扇輕搖
蛇鳥驚火精焰焰天西極旗亭四月柳如藍紫騮嘶風
黃金驂豈無扣牛歌亦有捫蝨談天生巉巖萃律骨蒿

萊槁死誰能甘我欲登泰山扶筇歎天關東溟若木如
可攀手弄日月青雲間我欲渡黃河赤脚凌秋波水仙
樓閣銀嵯峨徑叱海若笞蛟鼉停君翠杓聽我綠桐真
人開天六合同風騶虞鳳凰飛舞鎬宮有線五色獻於
重瞳補舜衣裳山龍華蟲虎豹九闕兮不可以達吾則
脫冠歸來兮丹丘之青峯長揖二三子目送西征鴻

常州

毗陵城西漁火紅家家夜香燒碧空荻花離離季子塚

楓葉索索春申宮鷄聲人語三十里大船小船浪相倚
鵝鵝一雙飛上天人在拖樓弄秋水

居庸關

車稜稜石确确車聲彭彭鬪石角馬蹄蹴石石欲落不
知何年鬼斧鑿僅與青天通一握上有藤束萬仞之崖
下有泉噴千尺之壑大行羊腸蜀劍閣身熱頭痛懸度
索一夫當關萬夫却未必有此奇巖崿吾皇神聖混地
絡烽火不紅停夜拆但有地險今猶昨我扶瘦筇息倦

脚欲扣往事雲漠漠平沙風起鳴凍雀

送鄭子經游霞城

陳旅衆仲

子經與我真弟兄海風十二吹青萍桐花影裏忽相見
美人為奏青樓笙酒酣氣盛欲飛起謂可戾契圖功名
樓前雪惡鴈欲墮寶鞭笑指丹霞城人生聚散亦何有
歲月與子相崢嶸金臺有約不可爽春船擬破滹沱水

泰定元年秋八月七日書於龍溪校宮時劉能

靜亦在坐

去年送君歌此詩今年我亦同羈棲年年離合誰所使
握手一指秋雲低我今歸矣子勿遲桐花落盡青樓西

題天台桃源圖

天台一溪綠周遭溪南溪北都種桃東風吹花開復落
游人不來春水高錢塘道士張彥輔畫圖送得劉郎去
昨夜神雀海上來洞裏胡麻欲成樹

和蕭秀才歌風臺

歌風臺前埜水長王媪賣酒茅屋涼酒邊父老說劉季

頭戴竹冠歸故鄉山河霸氣已消歇颯颯老柳吹斜陽
臺前小兒更擊筑筑聲更似三侯章

太玄子祈雪歌

傅若金與礪

至元二年冬不雪天子夙夜憂黎民宮庭擇日詔方士
臺觀通天求百神留侯之孫住龍虎世領祠官列圭組
鳬舄經時謁紫微鳳章半夜飛玄武皇天憂民祈可必
臘雪依微應三日望拜還聞在竹宮受釐忽報臨宣室
天地杳然韜玄功賜予紛紜恩數隆請和六氣輔元化

常使九州歌歲豐

憶昔行送雅勒呼歸武昌待高郵闕廣亦除靜江

同知皆未任

憶昔文皇御天歷知君已是青冥客寶氣經年動斗牛
璇光徹夜通奎壁比來蹇剝人所歎當路宣昭氣斯直
忽聞除書雙及門老親白髮生顏色秦郵近水足秔稻
桂林只今多盜賊待次且食武昌魚攜家不過湘南驛
王祥舊來驅別乘賈誼未久遭前席此時父老怨來遲

他日攀轅忽霑臆麒麟那愁九州大鳳凰早恨三山隔
秋浮江漢雲木清夜過淮河月波白新詩屢成知自誦
遠道即見何由得黃鶴樓前遇故人因君為致長相憶

邯鄲行

邯鄲城高下白日邯鄲市上風蕭瑟故壘空餘鳥雀悲
荒垣只見狐狸出何王墳墓對山阿尚憶諸侯爭戰多
趙客歸來重毛遂秦軍老去畏廉頗黃塵白草宮前道
鬼火如燈夜相照公子秋來不見過美人月下那聞笑

當時冠蓋激浮雲
撾鐘考鼓宴青春
只今惟有郵亭樹
還送年年行路人

和題吳閒閒京館王本中醉作竹石壁

薩都拉天錫

硯池花落丹水香
步虛白日聲琅琅
江西道士愛瀟灑
新粉素壁如秋霜
王郎酒酣衫袖濕
醉眼朦朧電光急
玄龍雲重雨脚斜
白兔秋高月中泣
倦游借榻日觀東
恍惚夜夢三湘中
鷓鴣啼斷江路遠
青林雨暗春濛濛

題喜壽里客廳雪山辟圖

一年在京口雪片深冬大如手獨騎瘦馬入誰家四
雲山如戶牖大江東去流無聲金焦二山如水晶瓜州
江口人不渡時有蓑笠漁舟橫一年在建業臘月梅花
滿城雪五更凍合石頭城霜風號寒氷柱裂秦淮酒樓
高十層鍾山對面如銀屏鷺洲不見二水白天外失却
三山青一年在鎮陽燕山積雪飛太行滹沱水合斷人
跡井陘路失迷羊腸長空萬里絕飛鳥卷地朔風吹馬

倒狐裘公子獵城南茅店酒帘縣樹杪今年入閩闕馬
蹄出入千萬山瘴煙朝暮氣藹藹石泉日夜聲潺潺雪
花半落不到地但見晴空湧流翠海頭鼓角動邊城木
末樓臺出僧寺何人蹇驢踏軟沙出門何處不梅花江
潮入市海船集水煖游魚不用叉良工寫此雪山壁過
眼令人憶南北玉京銀闕五雲端待漏何年鳳池側

送左祥卿之香山縣尹

貢師泰泰甫

九星排玉雙門開抱旗石鼓青鬼鬼帝子城邊跨龍去

仙人海上騎羊來，禺南燕北天萬里。
五月河邊青雀起，鵬鵠膏煖射晴虹。
海月光寒炯明水，宓子琴中化已成。
吟得新詩字字清，立馬街前待衙退。
刺桐花裏鷓鴣鳴。

分題得姑蘇臺送吳元振赴江浙省左丞

姑蘇城外江水綠，姑蘇臺是吳王築。
吳王宴罷越王來，館娃夜冷宮門開。
落花飛去春無跡，江邊却起姑蘇驛。
馬頭旌節何皇皇，候吏傳呼謁道傍。
孤山梅白堤柳黃，相君入坐中書堂。

送涇王府蒲司馬西還

重弓滿引鳴鏑和翻身躍馬渡長河日高射獵王半醉
軍中司馬功最多白狼西來獻天子腰間玉龍鱗甲紫
寶書絨奏動宸京黃封御酒貺邊城弦蒲汭鞠幾千里
芳草萋萋春似水鳥聲山色不勝情枚生作賦才難比

送張介臣伴讀歸省濟南

白天迷濛日脚消雪花散落風飄蕭重裘著體如壓鐵
呼酒不來寒正驕東風匹馬去千里仰視王屋當雲霄

到家方慰母心喜入門更聽兒啼嬌華燈夜照舞衣熟
彷彿鳴鳳和笙簫暗黃著柳垂長條虎闌春信趣還鑣
一杯遲子城南橋

題蘓武李陵泣別圖

歐陽檢伯恭

浚稽山前箭如雨渤海岸邊羝不乳同是肝腸十九年
白髮君歸朝故主臣心有血一斗許亦欲隨君歸纍鼓
五千健兒五千母臣若獨歸魂魄苦空將老淚寄君歸
歸洒茂陵墳上土

題金宣孝太子墨竹

張翥仲舉

少海神光射天起中有螭龍龍有子混同江聲何處來
卷作琳琅墨池水蜿蜒歛起鱗甲張蛻骨立化千筭當
一朝侍臣抱髯泣鶴駕不歸雲路長百年梁苑陵谷變
流落人間能幾見明昌內府應秘藏小字親題保成殿
吁嗟帝子真天人此君亦作天人真君不見洋州老太
守揮洒雖工無此神

題李白觀泉圖

玻璃杯中春酒綠醉墨淋漓牡丹曲平生合置七寶床
白苧烏紗美如玉阿瞞荒宴百不理寧計宮花街野鹿
何物老嫗生此兒偷向金鷄帳中宿高將軍纔奴隸耳
誤使脫靴吾所辱要留汗襪踏鯨魚鼠子何堪煩一蹴
尋常溝瀆不可濯何處容伸遭汚足翩然却下匡廬雲
五老峰前看飛瀑

周昉按樂圖

美人按樂春晝長綠髮翠袖雙鳴璫玉簫高吹銀管笛

二十三弦啼鳳凰後來知是調
箏手窈窕傍聽曾誤否
梁州徧徹六么翻此曲惟應天上有
行雲不動暮雨生
流鶯瞥目飛鴻驚宮馳羽疾爭新聲
花月六宮無限情
君不見後庭玉樹黎園譜日日君王醉歌舞
一朝輦鼓動地來祿兒危似韓擒虎
丹青縱復工何益由來嗜音
必亡國田家機杼人不知好寫幽風勸蠶織

綠玉連環歌為邢從周典簿作

于闐河頭夜光發赤髯賈胡采
明月中有美璞凝寒晶

惟有鬼工能琢成伊誰得此邢公子示我綠玉雙連環
恍如空碧虹氣垂半隱青瑤蟾一規展之兩環不盈尺
疊作團團小蒼壁黻文錯落映雷文宛是昆吾寶刀刻
廬陵學士癖好奇辨古重以瓊琚詞珊瑚佩鉤詎可數
我疑制自金源時集賢仙公丈人行鳳閣舍人文有樣
請君留束錦宮袍待看揮毫玉堂上

入京


危素太朴

春風浩蕩吹江南危子行年二十三長謡空谷天蕩蕩

劍倚白日風潭潭氣高却怪星象動身在肯為飢寒貪
宮中聖人朝萬國臣抱犂鋤在山澤中年讀書空自勞
三島求仙豈能得齒牙未落心未摧欲奏長策天門開
周公仲尼沒已久麒麟鳳凰去不來世無忠臣與孝子
四海風俗何由回

徐人歌

季子有劍秋水色徐君見之惜不得徐君墓上荒草寒
季子解劍挂樹間一生一死見交義嗟哉延陵吳季子



乾坤清氣卷四

欽定四庫全書

集部

乾坤清氣卷五至七

詳校官中書臣丁榮祚

助教臣常循覆勘

覆校官中書臣方大川

校對官中書臣葉炎

謄錄監生臣任鑑

謄錄監生臣馬紹基

欽定四庫全書

乾坤清氣卷五

明 偶桓 編

七言古詩

望嶧山

鮮于樞伯機

東方巨鎮宗岱宗羣山列侍臣妾同西南崛起一萬仞
却立不屈如爭雄何年天皇下星宮墮地化作青芙蓉
外如刻削中崆峒閭風玄圃遙相通我昔東游訪青童

羣仙招我游中峯悔不絕粒巢雲松失身誤落塵網中
如今可望不可到艤舟空羨南飛鴻神仙可學事已晚
安用屑屑悲秋蓬吾聞嶧陽有孤桐鳳凰鳴處朝陽紅
安得斲為寶琴獻天子為民解慍歌南風

木牛歌

劉詵桂翁

吾聞景升養牛千斤肥椎之不了士卒飢王生號牛八
百里徒瑩蹄角將何為此猶虛名乏實用負任毫末了
不支何如武侯象其似獨化枯槁為神奇平生憂人不

自食餉運常飽千里師
剗心俯首竭筋骨氣象深穩人
誰疑中多抱負外遲鈍
論功猶勝狂犢馳雖無奮勞効
畊種尚以微力裨興衰
自期中道可不廢雖有捷徑寧
能追惜哉清渭不可渡
未得束載四海隨我常讀書
論成敗魏不足控為吳
持江陵蹶羽子規衄
鄙南衰髮秋風知前謀
既輕後過重天意蹉跌長如茲
浩歌木牛感豪傑空有遺恨
供人知

天馬歌贈甲寅進士陳所安

房星夜墮滎波中
驊騮奮出如飛龍
昂頭星宮逐枉矢
振鬣雲闕追天風
漢家將軍三十六
分道出塞爭奇功
當時一耀萬里盡
蹴蹋少海霓旌紅
韓哀謝輿伯樂去
蹶塊誤落奚官庸
十年皁櫪食不飽
雖有駿步難爭雄
春隨錦韉北陵北
秋卧衰草東阡東
時從鴛鴦飲沙澗
未免泥滓沾風鬃
夜寒首宿山谷迴
長嘶落月天地空
時平文軌明蕩蕩
萬里穹荒無虎帳
交河不用踏層冰
累足山城學馴象
吾聞天子之廐十二閑
驥騄並收無

棄放金根雲罕出都門喚取雍容肅仙仗

送劉玉成之杭

錢塘之景天下無我昔未游知畫圖吳王闌檻神仙壺
沙河燈火錦繡衢四城翠翹上靈隱萬家畫舫游西湖
孤村梅花白雪廬大堤楊柳黃金株百年風物未盡改
遊子那得聞其初錢王觚稜墮秋蕪趙家宮殿佛鼓喧
朝晡西風吹潮落越嶠夜角呼月沈姑蘇劉郎妙趣世
希有五色粲爛披珊瑚請君一往覽古昔酌以千斛之

酒驚黃酥寫以文
考賦魯城之筆
千萬字吹以東坡
弔孟德之簫聲
嗚嗚歸來錦囊
壓蹇驢與君共
簸明月珠

題文山衡陽躍馬圖和須溪韻

將軍紫綬馳燕然
丞相白髮祁山前
重瞳悲歌泣虞美
伏波眼穿鳶墮水
英雄相望千萬年
西風荒草迷五原
延秋王孫折金鞭
女牆明月銅駝閑
衡山春濃風日好
紫韁電轉人未老
豈知蹶塊追海橫
海天如雪狂瀾倒
玉樓十二春衣妍
流雲却月爭取憐
落花金谷獨一死

蒼旻不語丹心傳劉家的盧空識意金粟龍媒俱久逝
少年相對那得知掩圖醉倚南風睡

銅雀硯

周霆震亨遠

柏梁仙掌辭深殿西晉銅駝棘中見魏臺片瓦閱興亡
流落人間還作硯無情漳水去不回西陵罷望餘蒿萊
分香賣履俱寂寞獨此微物留餘哀客卿子墨辭滂沛
管城中書鋒課最銷磨不盡建安年照見姦雄心膽碎
按頭拂拭塵土昏幾刼冷灰藏燒痕不足文房收薄用

斷碑殘磔復誰論

杜鵑行

我不暇自哀古帝魂春來却念今王孫
王孫馬蹄去何處但見黃鶴落日故宇煙塵昏
我昔蜀帝空名存絕憐王孫玉牒尊春宮天鵲壓酥酪凝香夕帳貂皮溫紫茸
吳姬河西曲白馬怯薛鷹條捫居民只尺甚天上冠冕臣僕羣趨奔漢川一炬寇飛度四海寒食如荒村暴骸泣霜闌月老恨血埋雨江波渾投鞭七寶委道側落花

送客慚春恩勸歸我亦久
流落幾欲出口聲復吞莫道
人生歸去好江南無處弔王孫

驥羣空

幽燕之馬毛骨殊龍種肇自崑崙墟
百年帝業振長策玉帛萬國同車書
明堂大開武庫列白日矯矯升天衢
昨來毫穎吐芒角赤祲光怪干斗樞
河流頓徙渥洼竭天廐十二驚駘
居中原塵起遂鼎沸御者撫轡空長吁
盛衰反覆古來爾誤國致此其誰歟
英雄緩急何代無

惠養汗血由攻駒五陵佳氣毓神雋往問伯樂今何如

代北鷹

陰山角鷹距如鐵天壓穹廬飽霜雪御前校獵誇遠揚
海口朔風吹地裂憑陵殺氣隘原野走馬身翻臂韝掣
秋飛鴻鴈春燕鶯分寸躋攀勢縣絕山東一夕塵沙黃
狐兔根深豺虎穴古臺寂寞呼不聞坐使荆榛徧城闕
嗟哉爾曹既不能訴冤口流血又不是造天逢翼折上
林供奉濫君恩架上錦條長綰結偷生忍恥獨何心天

下滔滔同一轍

哀余淮南

昆侖烈風撼坤軸日車欽轡咸池浴六龍飲渴呼不聞
赤螳玄蠱厭人肉荆襄弗支廬壽孤江東埽地如摧枯
忠臣當代誰第一七載舒州天下無東南此地關形勝
天柱之峯屹千仞當年赤壁走曹瞞天為孫吳產公瑾
我公千載遥相望崎嶇恒以弱擊強孤城大小二百戰
食盡北拜天無光當闕拔劍蒼龍吼盡室肯汙姦黨手

摧鋒闔郡無生降羣盜言之皆稽首堂堂省憲羅公卿
建官分閫日募兵哀哉坐視無寸策遂使流血西江平
向來不曉皇天意大將南征死相繼一時貪暴聚庸才
玩寇偷安饗富貴河流浩浩龍門西燕山萬騎攢霜蹄
英雄暴骨心未死去作海色催朝鷄玉衣飛舞空中見
太息孤忠鑒百戰五陵元氣待天還睢陽誰續中丞傳

哀李潯陽

蜀川會漢投匡廬潯陽之厄江西樞李侯伏節忠貫日

存歿誓與城池俱夫何郡將弛練卒世祿忍負私其軀
寇來談笑啟闕遁坐使邑井成丘墟侯時力疾短兵奮
臣首當血心當刳魂歸謁帝慟伏闕塗地肝腦民何辜
臣衷願瀝付渠荅臣首欲飛宜僕姑誓堅洪壁殲衆醜
却埽淮蔡匡全吳黃塵四低黑風淡赤豹騰駕蒼蚪呼
山川幾刼鑄英氣上遡古昔誰其徒平原汗馬河北重
江淮安堵睢陽孤顏張凜凜心未死迥立千載誠相孚
况聞有子殊激烈義在從父輕頭顱石頭之袁姑孰卞

兩間忠孝何時無紛紛賣降與棄甲仰視汗喘呀長吁
惟公益自元氣立顧盼所取皆詩書當年射策首多士
已分一念金無渝勗哉謀國慎所託古今大勇惟真儒

哀張千戶

貫楊將軍年十九祖父死邊功不朽虎符前月始蔭官
衆議南征推好手奮身萬衆首塞旗偏鋒再進深履危
瘴煙毒霧晦白日飲血拔箭輿尸歸閨中青年美如玉
昨夢夫還兒在腹兒生夫死時日同忠在王家三世哭

陰山之虎出文彪海鷹抱雛霜角邁雄心九死知不悔
散入鼓角邊城秋堂上老姑髮垂縷帳底兒啼淚如雨
淒涼部曲舊營存千里魂歸投幕府幙中大將坐封侯
生平不識青海頭

贈鐵腳劉道人

馮子振海粟

道人鐵腳更鐵冠山人鐵面仍鐵肝道人山人兩相值
面色脚色俱蒼寒道人鋒稜厓骨削山人劍氣星斗干
山空人去夜猿別一葦北渡黃河乾盧溝月濕波蕩滴

太行雲嵒峰嶺屹古來豪傑數燕代長轂騷裊榴花鞍
呼鷹射鴈逐鷄狗脫手拓彈排金丸壁門雙闕照燕碣
虎豹蹲踞蛟龍盤布衣一語動萬乘不識宰相為何官
雲飛風起對紫檀血指漉漉衷如丹尚方百奉諂骨裂
山人九死聖度寬萬里放還真墮甑回視歲月驚流湍
南山清渭一夢覺但見落葉吹長安道人搥札未棄置
欲刻朽骨為榮觀野麋豈是麟閣具滄海自分終魚竿
窮林尺鷃無處著豈意思想南溟搏人間新貴奪紉綺

曲眉婉孌浮山巒為渠向作白玉盤眼耳鼻舌渾熟瞞
劉郎他日高眼看歸來取缺歌馮驩

送彭丙翁胡復初采詩

吳缺原可

君行為我觀海潮淞江亭下風蕭蕭君行為我泛湖月
蘓公堤上楊花雪只今何處不聞詩南音寥寥君得知
海風吹寒翡翠尾秋露滴老珊瑚枝山川光怪豈敢閔
采之采之盡君意願君勿學梁昭明是非未定輕閑情
願君但似吳季子四海之風定誰美馬蹄跌宕輿地開

幽燕浩浩風雲來丈夫西游今可矣前日江南數千里

別廣西憲史張漢英

陳缺渙翁

長吟不了秋堦蛩君飲不盡春江虹涓涓泠泠仙掌露
落落穆穆長松風少年憲幙廣西去意氣倏忽超鴻濛
御史行部玉花驄南度瀚海君與同日出鰲頭指若木
月明鵬背看芙蓉有時調笑却蛟鰐赤手得珠龍伯宮
君才一似列蕃貨明犀色射珊瑚紅象牙鶴頂世所有
桂蠹盛以玻瓈鍾歸來老母怪方朔何事紫薇衣袖中

劍光差差不可狎寧教小蟄全其鋒願君此行好自愛
雲氣蓊蓊東崖東

題徽宗織錦圖

楊子承

君不見文君白頭吟冰絃撥斷鳳皇琴又不見明妃離
漢闕馬上琵琶青塚月爭如深宮白晝長美人睡起慵
梳妝能將千條五色線織成一片雲霞光一姬織罷春
織困香軟東風扶不定雙蛾淡淡遠山橫嬌羞未醒梨
花夢一姬辛勤不下機機聲軋軋穿梭遲都來半軸秦

川錦不知補袞當何時行雲隨影肌凝雪斜暉烏絲寶
釵滑桃花瓣脫芳塵中壓碎環兒馬嵬襪道君玩物何
拳拳黃金博得芙蓉仙尚期千秋萬古傳玉書圖記宣
和年金戈南下闕虬虎中原白骨埋黃土青城赴約落
姦謀江山如錦誰為主一龍北狩不復還我今聞之心
猶酸豈料人間存此卷相逢依舊春風面

哭女醜行

段天祐吉甫

段家五歲花枝女繡帽彩衣嬌楚楚全家看作掌中珠

不但阿爺憐惜汝阿爺官滿常熟州移家來杭年未周
無心偶得汝懷抱使我頓解平生愁自從生汝三月後
喚汝醜哥要長久阿爺正因憐汝深命名剛以好為醜
蘭芽玉樹春照映綽約身材好情性易得易養不藉人
最喜生來不知病一年二年長精神三年言語字字真
舉頭四面候人意識人歡喜知人嗔四年行履輕且便
堂上來往如春燕阿婆房裏索梨栗大姊床頭覓針線
眼明望汝到成人門楣之秀閨房珍斯須不見情緒惡

逡巡或來顏色新至元戊寅月窮紀江上奇寒寒墮指
家家兒女病痘瘡十家之中九家死阿爺適奉差遣行
臨行顧汝難為情舟中一見九回首道上半旬三寄聲
明年正月初七日忽得家書知汝疾置書案上不忍看
便道多凶還少吉良久殷勤問來者荅言勢惡君當舍
瘡頭黑陷苦爬搔目瞑口噤如盲啞爾後三朝書再至
知汝繼世即遐棄遡風南望淚闌干十日如痴復如醉
汝生汝死都在天與汝聰慧不與年含靈蠢動保壽命

造物不能天兩全華亭官舍寒栗烈簷雨淙淙燈暈結
一時往事到心頭誰道阿爺腸似鐵

原缺

官事得容與

江橋明日風帆舉到家剪紙作金錢桂酒椒漿當酹汝

題胡修撰金華雜興小藁 黃清老子肅

吾聞金華之山東南峯石壁巉絕如飛龍滄溟盤礴幾
萬里但見扶桑日影倒挂金芙蓉山中仙人古愚老青
霞落落雲間松翩然獨去游無窮謁帝西上昆侖宮春
苔染水碧于酒輦路人家挿楊柳金莖露瀉明月珠散

落人間作星斗君不見西山日上紫氣橫花下有人調
玉笙太平擬進九成樂五雲樓閣生秋聲

上繼學王公

大風卷地沙塵昏十日不得一出門
胷中俗子浩于海思欲一見雲中君
雲中之君玉為節鴈冠莪莪照晴雪
振衣驚落琪樹花片片人間作明月
有時霹靂生風雷松聲曉失青崔嵬
衆芳收雨作春色瑶草綠徧三蓬萊
有時筆端吐光怪干將生花五龍蛻
廣寒天上聞步虛

萬壑千崖度秋籟嗟予困學無所成仙家幸識黃麒麟
願從輞川覓詩法白鷗吟入南山春

丁卯及第歸和揭經歷見賀詩

兒時見月欲上天昆侖獨往三十年山深染得秋水綠
所思忽到梅花邊螢燈照雪心炯炯危坐空齋似禪定
落花啼鳥意不驚澗瀑松風自相應書成上謁天帝君
半夜掣起扶桑雲麒麟崢嶸列萬戶虎豹踞鼎縣千鈞
翠盤八珍為君薦劍珮鏘鏘揖羣彥木天日上五色雲

知有百靈護經傳春城如海花滿園狂吟中有白與元
至今風雨飛動意垂楊起舞花能言銀潢東流幾時了
松下夢回秋又曉蒼蒼此意誰得知蟾闕佳人霜雪皎

送海東之

海東之玉關之人奈子何一朝趨試當大廷搜奇抉秘
如縣河胸中二三策發憤精研磨中山兔毫渴濡染綠
文巨硯出大沱御卷足揮霍如見山之泰華江之番紫
髯長戟凍不折濁流鼓柁冰莪莪得官固好好東之情

最真遂使吾儂日相親不誇文字雄退與寒士相推尊
淫哇鄭衛非所云闔閭城邊種楊柳江柳子子亦聞
我有刻玉書願與窮朝昏子若修之可凌雲不廢世間
功與名況聞子弟功策勛一門科第凡五人瓊林之中
翺且翔如此文文而章章所以青城樵者有歌曰海東
之兄弟三人如鳳皇我歌曰二雛亦復鳴朝陽再歌曰
二雛亦復鳴朝陽

王鐵槍像

楊維楨庶夫

鐵槍兒五代傑滑中歸來義尤烈捷聞三日破南城鐵
槍奇兵果奇絕鐵槍折河北裂唐家又移梁日月阿巖
雞狗何足尤虎豹一死皮須留烏乎痴頑老魅老不死
朝梁暮晉復歸周誰復拔劍知相仇

王粲登樓圖

臨洮水涸銅人毀西園青青草千里秦川公子走亂離
瘦馬疲童面如鬼俊君威命誇漢南虎視走鹿何耽耽
可憐膝下盡豚犬誰復大厦收梗楠落日樓頭髀空拊

目斷神州隔風雨平生不識大耳公座上客歸丞相府
春深銅雀眼中蒿攬涕尚復思登高江山破碎非舊土
版圖何日還金刀荆臺高樓已荆棘丹青寫賦工何益
君不見袁家有客能罵賊將軍頭風重草檄

漁莊

君不見裴家之莊在子午臺池已作張家墅又不見李
家之莊在平泉花石亦入陶家園不如漁莊在崑之所
官不得奪人不得取或言投長竿蹲會稽釣嚴灘隱蟠

溪彼數子者逃名而名至孰能索我于東溪之東西山
之西春江冥冥春水瀾瀾桃花亂流跳魴與鱖會稽丈
人本釣徒釣竿手拂珊瑚株浩歌小海入東去大魚鱗
鱗來媵予子知我我知魚濠梁之樂樂有餘

二喬讀書圖

喬家女兒雙芙蓉一代國色江之東亂離惟恐埋百草
豈料一日俱乘龍江東子弟孫郎策同住周郎道南宅
弟兄不減骨肉親喜作喬家兩嬌客明年策死鏡中妖

銅雀春深愁大喬自是阿瑜能了事黃星一道隨煙消
小喬初嫁有如此天下三分從此始風流顧曲本多才
風雨雞鳴戒君子喬公教女能詩書豈比小姑持刃為
帳中草檄名漢賊已知事屬方頤兒君不見阿瞞晚贖
蔡文姬博學才辨何所施天下羞誦胡笳詩

題錢選畫江山萬里圖

神禹劃天塹橫分南北州祇今天不限南北一葦航之
如丈溝洪源發從瞿塘口險峽中擘分黃牛括漢包湘

會沅澧二妃風浪兼天浮青山何罪受秦赭翠黛依然
生遠愁洞庭微波木葉脫有客起登黃鶴樓老瞞橫槩
處醺酒澆江流江東數豪傑乃是孫與周東風一信江
上發從此鼎國曹孫劉吳南晉北後倏忽開六朝江南
龍虎地山水清相繆渡頭龍馬王氣歇洲邊鸚鵡才名
留新亭風景豈有異長江不洗諸公羞宮中金蓮步方
曉後庭玉樹聲已秋何如一杯酒錦袍仙人月下舟解
道澄江淨如練醉呼小謝開青眸鐵崖散人萬里漚拙

跡今似林中鳩不如大賈舶江山足勝游腰纏只跨揚
州鶴樓船不問蓬萊丘平生此志苦未酬眼明萬里移
蒼洲烏乎楚水尾吳江頭山河一髮瞻神州孰使我戶
不出兮囚山囚

題馬文壁弁山圖

七十二弁一弁高而孤兩雷相望有如大小姑我昔攀
蘿上孤弁曾見碧眼胡浮屠生絹一幅在下地三萬六
頃鴟夷湖湖山閒圖一嘆息胡僧幾歲寄我空中書

淵明漉酒圖

義熙老人羲上人一生嗜酒見天真山中今日新酒熟
漉酒不知頭上巾酒醒亂髮吹蕭肩架上烏紗洗糟蘖
客來莫怪頭不巾巾冠豈為我輩設故人設具在道南
老人一笑猩猩貪東林法師非酒社攢眉入社吾何堪
家貧不食檀公肉肯食劉家天子祿頽然徑醉卧坦腹
笑爾阿弘來奉足

送人之浙省幕官

潘純子素

東家老人語且悲衰年恰憶垂髫時王師百萬若過客
青葢夜出民不知巷南巷北痴兒女把臂牽衣學蕃語
高樓急管酒旗風小院新聲杏花雨比來官長能相憐
民間蛺蝶飛青錢黃金白璧大宛馬明珠紫貝西洋船
繁華消歇如翻掌官中賦歛年年長里巷蕭條竟不歸
華屋重門結蛛網語中嗚咽不堪聞飢狼餓虎方紛紜
麒麟鳳皇那復得使我益重髯參軍參軍在官僅一考
素髮蕭蕭坐成老上官掣肘下吏罵賴有閭閻獨稱好

杭州公事天下繁大材取決無留難參軍累官日益貴
何術可使斯民安

乾坤清氣卷五

欽定四庫全書

乾坤清氣卷六

明 偶桓 編

七言古詩

送周生

李孝光季和

二月已莫江水深春風吹折行人心
山頭明月落未落
杜鵑夜半莫哀吟泊船上有青楓林

三月欲來花繞陌又唱銅鞮送行客
男兒莫爾可憐生

男兒生身好顏色拔劍起舞雞鳴柵

沙頭酒店

江邊楊柳金蟲落雨過桃花香漠漠沙堤小市似新豐
阿姬十五當壚惡縷金半臂雙鴛鴦翠杓銀罍勸客嘗
嘶殺門前五花馬羅敷有夫空斷腸

和陳叔夏章字韻詩送此山師

天孫織錦當朝陽銀梭軋軋回天章麒麟鳳皇映東壁
煌煌珠笈帝所藏分送天人寶花雨紫狐夜泣龍髯塵

袖間明月大如屋老蛟來飲銅盤露天孫何曾辛苦為
春風吹綠雲錦機娉婷盈盈渡河漢世上那有新相知
送達兼善典簽

江頭風多花暗天舟子擊鼓牽官船繡鞍大馬來如煙
學士翠鵬袍領妍袖中三尺軟玉鞭手揮送者日在山
隴西男子更致言東方民力願少寬達官擔橐橫索錢
先生歸到明主前上言赤子天哀憐仁人在位如解縣
大臣不讓臯夔賢天下畫一撤張絃未將鼎俎烹小鮮

如吾但當歸力田眼見霖雨開豐年墻下飯牛薺花園

送陳君禮之嫠女兼寄徐仲禮

陳公子騏驎駒餘一日馳萬里珍怪生從渥洼水不隨
衆馬仰秣芻泛駕亦莫牽鼓車陳公子公起為我舞我
能為爾歌古來豪傑不擇術蕭曹刀筆終身多身為國
士足可惜致主堯舜今何如陳公子努力富貴勉自強
白髮坐見千丈長鄒陽枚乘馬足學去學董子登賢良
讀書未及無伴律脫令貧賤猶馨香陳公子我之故人

柏臺史三年不得一書紙鞭騏笞鳳作官府往往吹笙
碧雲裏芙蓉衣裾雲錦構手奪天巧天孫愁豈憶故人
在下土夜半短衣行飯牛陳公子我有幽蘭白雪之古
曲不辭為言歌宿宿有使東來即寄書莫學故人忘我
為

舟中為人題青山白雲圖

江氣顛顛如蛟龍曉風吹落金芙蓉神女凌波洗雲去
暮為行雨陽臺東朝來白雲散白石小姑娘蛾眉翠欲滴

老蛟化為百歲翁彭郎磯頭夜吹笛

送林彥清

有客新自東方來
矐子如月無纖埃
言昔東見容成君
接上軒轅張樂之
層臺手捫青天冷
至骨白榆列宿何
崔嵬軒轅仙成去
已久皆騎威鳳驂
龍媒珠璫明珮隔
風雨天門晃朗相
當開仙家玉女少
愁思踏雪雙歌紫
雲迴君嘗教我三
洗髓已覺靈氣生
根荄我時坐客桂
樹下縱之使言手
拄頰客似師橫差
短耳眼似恨小髯

髮鬢不見橫君三十年眼中見子吾已衰却憶相攜入
鴈谷山中二月如天台風吹桃花行水面大笑酌我紫
霞杯客今好游自不惡名山往往多奇才倘逢俗子莫
與語世貴瓦缶輕尊壘舟行江中慎濯足磯下乃有鼈
與能更莫然犀照水怪自倚善幻驅霆雷望見九華足
雲氣一上絕頂驅蓬萊

題楊鐵崖琴書安樂窩

舉世之樂無如鼓琴琴可以禁人之邪心易人之哇淫

舉世之樂莫如讀書書可以絕小人之狹邪履君子之
坦途世人為樂千種有不如我樂長可保叶彼有嗜飲

樂飲逢毒若醜艷妻惟娛自令身枯溺

缺

貨殖為盜賊

積崇勢凌人鬼神斷嗔蚤官驕子疾為禍首或世所樂
自詭神仙累萬人學無一長年有樂放恣毀除鬚髮捐
棄父母終竟不覺有察于獄謂彼不慚性習浸移久而
泰甚凡此衆樂豈不可懷不如我樂無患與葛鐵仙左
琴右書傳終日危坐笑以哢忽見吾詩仰天歌鐵仙豈

不大樂哉

曹伯珪築室曰桂齋戲作俳偕體

釋大訢笑隱

阿仙騎鯨白銀闕
醉折秋花餐玉屑
霓裳曲散墮清塵
涼夜素娥悲白髮
玉輪碾香空翠寒
流光萬里君合懽
大星漸低海色白
高齋翠影空團團
萬卷芳心期厚地
憔悴秋香忍相棄
百年空使富貴羈
淮南小山歸不歸

扶桑行送銛仲剛東歸

丁復仲容

日出扶桑根日上扶桑頂海色秋茫茫天光何萬頃扶
桑日東出若木日西落日始明扶桑人不惡扶桑
有國自鴻荒有國有人天性良亦復有君臣棟宇垂衣裳
自古國有主不知何姓氏聞自周中王世嗣相傳宗揖
讓至今惟一姓不識有興亡君君臣臣父父子子至道
之綱何弛何張且吾聞之扶桑之國人寧殺不受辱豈
不謂死亦何短生亦何長身在義所恥身死義不忘皇
元發仁被六合海服遠來貢大舶凌廣洋陳辭極懇款

罷物盡精緻黃金鑄甲白日光大珠徑寸夜發芒利刀
截鐵斷兩旁水玉拾海底湛澈團天漿竒才妙識不及
數一一具獻無詭藏上者國有使下者通販商年年以
為常奈何漢中葉獨用桑弘羊內府無錢愧張武大官
小吏貪如狼懷金辱明主穢德腥外邦彼豈侮大國顧
敢為猖狂夜半海水赤南風無回牆十年不遣使東天
遂裂長鯨奮怒火熾揚波濤洶生海中不寧上人何年
來腫人正碧髮未蒼詞句所發如衆妙香自言讀書在

扶桑慕法五天竺十七來錢唐十八姑蘓住浩歌濯滄
浪問劍虎丘石挂席楓橋霜古臺吟鳳去新寺訪龍翔
振衣香爐顛洗鉢三石梁天上歸來虞閣老留之廿日
埽室置禪床笑謂門生及兒子海國有此圭與璋一一
作歌送彷彿扶桑之故鄉珊瑚樹底龍所宮照之五色
雲錦章龍兒護惜不得睡中天夜掉紫玉幢意用慰此
遙相望往年上人去我在雪上不得見前年上人歸我
方就宅園中央日夕還往雙檜下列榻坐受南薰涼寫

詩不記首把酒無數觴
苧袍浮霜踏月色夜未及鼓猶
攜將雙檜先生不及仕抱甕灌園而已矣有家何曾隔
海水有路未即還鄉里園芎二畝差可擬菜本作羹播
其子日日月月逝莫止朝朝莫莫聊爾耳此非天運固
如此扶桑之國邈東溟子其懷歸子所應天之所以在子
無能方今天子聖且明子能有道玉帛徵林泉之家從
所營子子孫孫無盡燈子國君臣家父兄一日聞之千
載名子毋扶桑歸聽我歌此扶桑行

月灣釣者歌

月灣釣者天與閒長日釣魚明月灣
黃昏坐到月上山天低月高人未還
月圓在天半在水明月灣頭人所喜
先生月灣家密邇坐釣明月那可已
波神起笑弄明月月滿波心魚撥刺
柔絲搖月寒餌沒爛月錦鱗魚上出
得魚叩月喚隣家煮魚和月吞香霞
舉杯月來金滿花湮光漾月天無涯
杯痕倒瀉月入腹月興惱人清不足
杯空仰天月照目顧影翻憐月孤獨
夜深月冷霜滿天

勸月不飲月乃延置杯餽月坐月前月謂汝飲天之緣
呼童就月即更酌月故憐人月不落月在憂來無處著
但恐樽空月相却豈不知曹老瞞明月可掇憂無端豈
不聞嚴家灘漢月不滿羊裘寒非熊辭月就西伯夜夜
渭川空月白未如明月灣頭客釣月取魚賒酒喫忽自
笑把酒問月者何如古人今人月在諸金尊照月長不
虛胡為捉月騎鯨魚青溪好月連江湖迴環九曲月若
鋪我今亦願為月灣釣者徒磯頭展席為月沽酒後耳

熱醉舞明月歌鳴鳴

題長江萬里圖

天不限南北人方樂畊漁承平百年日慷慨萬里圖恍
然舊游地浩蕩清興發放船白帝城下秋載酒黃牛峽
中月明發古夷陵為訪姜詩井披蓊冑修筒寒花汲空
冷湍流激柔櫓峻下荆門灘荒藤漢景廟落日還登攀
霞沈宜都驛夜宿松滋渡水色瑤瑤光繁星粲無數荆
南亦坂郢章華猶故臺壞堤明斷鋸團沙如粟堆雨休

雲夢澤天空洞庭水曹瞞敗軍處殘灰餘故壘仙人白
雲表招手為我留待網嘉魚穴銜華黃鶴樓醉來思襴
衡憤起叱黃祖不見人間來鳳皇何用筵前賦鸚鵡磯
頭若蹲虎江流多怒聲客枕不成寐已在潯陽城飛瀑
瀉銀河匡廬倚天碧遙憶義熙人黃花空好色黃陵二女
廟小姑江上頭舟人問風水幾日到揚州月色過馬當
長風沙在眼鴈投秋浦雲鴉歸戍樓晚蕪湖水東注逆
磯無回波兩山隔江許倒浸雙青蛾抵掌女媧石浩然

歌白苧太真然屏真自愚謫仙騎鯨竟何去黃鬚天子
七寶鞭曾挂當塗道邊樹一百二十里樹色連長干豪
將多反覆都邑無時安金蓮曉步滅玉樹朝歌闌千載
空舊迹令人起長歎天運開昌期地險亦何有年年江
上春東風入楊柳往來白下亭日夕金陵酒燹船出金
焦越賈行松維況聞巴人婦半是吳女兒我生亦何幸
白首無亂離所願億萬年永永長如斯

送林彥清歸永嘉

鄭元祐明德

玉晨明皇大道君丹霞上宮校瓊文芙蓉製冠珠織裙
並乘綠輦駕飛雲有美一人岸青盼來從東甌東海濱
不笑不語寡戚忻帝驚顧語仙聖羣是能執持神化蘊
子昔夢噩帝怒責拯子于危釋憂懂報崇仙階秩孔殷
尚念無以章殊勲琳宮紫幄珠流煩靈來乘純去乘雲
影響濁世那由聞神孫飄翩接芳芬烹陽治陰調夕昕
氣神元精駐不分由能鍊之久益賁水浸不弱火不焚
是謂真人非外焚鴈蕩木落溪沄沄子今東歸似驚麋

將與浮脆同氤氲醜之清泠濯垢氛我將學之意則勤
其如衰年日已曛况復歲晏手足輟作詩送子空云云

五峰將還維揚因言沈侍郎在吳賦此以寄

二月桃始花三月客還家階前踈雨落堂上春衣薄為
言沈約在吳中玉壺青絲酒如空春風相過蕙草綠芳
菲滿堂樂未終

懷友人俞伯貞

沈存肯堂

去年秋風卷黃埃美人躍馬沙邊來今年秋雨洒白日

美人遠上黃金臺
黃金臺下燕山道
漠漠寒雲接衰草
鴈飛不斷青天長
長使征人路傍老
美人美人胡不歸
清霜凋盡珊瑚枝
臨風三嘆思欲絕
悲莫悲兮生別離

擬梁簡文體送鐵文彬左丞奉召北還

鄭基本初

將軍功蓋世
揚威淨海隅
蛇矛縈後騎
虎衛促前驅
三門開地甲
八陣轉天衢
鏡鼓潮頭響
竿旗日下趨
飛梯躡暗島
合璧示宏圖
降醜尋封奉
帝廷聖書
銜鳳落青

冥再召伏波歸闕下南荒銅柱已鐫銘駢駢返駟馬黃
河春始融輕風流碧塞晴日炫彫弓柳折秦山麗水消
泗水通錦鶻窺長坂白鴈墮春空黃封將法酒羽檄候
元戎麟閣圖形已預知更應設帳會瑤池夕劍花光歌
吹歇御帖重頒紀宴詩

美人圖

郭翼羲仲

鬱金殿前楊柳新長門草色春復春下堦微微動香步
波影晴光流素塵翠釵蜻蜓彫玉珮攬髻回風舞裙帶

合懽花落無好枝
伯勞單飛鶯亂啼
玉音夜夜宮車絕
露點蒼苔怨明月

送秀石芝上人請龍門禪老住奉聖寺

芝草生秀石野樹含碧姿
青山為屏幃白雲為藩籬
菩提提山中之人胡不歸
乃言要與龍門期
龍門吾友僧者奇
爾母恃力奪去之
龍門山高開翠微
兩崖峽束雷雨垂
六月陰陰看雪飛
不肯走熱觸且馳
南澗送爾來乞詩
爾速行矣無遲遲
交游莫年星亂稀
微斯人兮吾將

疇依微斯人兮吾將疇依

雲泉生歌

雲泉生氣如雲其心玉堂水汪汪萬傾澄不清雲將龍
變化水與芙蓉青華岳天風動飛鶚朝陽噦噦孤鸞鳴
雲泉生其家亦貧無一錢躬畊何用南陽田諸侯不薦
士朝廷不求賢讀書試吏東海邊君不見漢留侯掉舌
曾為帝者師張鎬窮谷一叟耳丈夫際會各有時騏驎
一日千里馳未遇伯樂猶鳴悲荆山之璧亘光彩世無

卞和誰識之君子富貴端可期施之政事無不宜浮雲
漠漠抗高節君之心兮江水知捧檄自甘升斗祿城裏
青山照書屋回首西風瓜戍秋把酒青天送黃鵠黃鵠
兮高飛啄琅玕兮飲瑤池再飛直上昆侖栖鷄鶩螭龍
豈與尺鷃同藩籬雲泉生錦袍仙人爾之祖步武金鑾
動人主采石江頭秋月高焰焰文章照千古功名事業
在壯年安得與子同飛騫甚矣吾衰也久矣山中早晚
結松屋遲子歸來兮月明爛醉歌雲泉

題畫松壁

鄭東李明

八月江頭茅屋破，日日盲風雨交和。
眼前安得大廈成，拾遺歸來淚空墮。
紛紛萬木爭出山，瑣碎榱桷非為難。
萬牛莫挽梗與楠，往往棄置丘壑間。
獨立風霜二千尺，未識何時逢匠石。
白頭老樵空嘆息。

題趙魏公墨竹

陳基敬初

魏公仙者徒清風，動千古夢斷江南春。
飄飄遊帝所，鈞天張樂如洞庭。
十二參差鸞鳳鳴，歸來記得當時曲。
寫

作湘靈鼓瑟聲高秋素壁含蕭颯彷彿涼風起閭闔滿
天明月浸鷗波歲晏懷人霜露多

僕嘗夜夢從彥成飲彥成曰此荔枝漿也飲之
令人壽子能為我賦之當贈三百壺予自口占
一詩覺乃夢也及會玉山聞彥成釀酒果名荔
枝漿以夢白之不覺大笑玉山曰君當書此詩
吾當與子致酒以質所夢因莞爾書之彥成見
之必更一笑也

涼州莫謾誇蒲萄中山枉詫松為醪仙人自釀真一酒
洞庭春色嗟徒勞瓊漿滴盡生荔枝玉露瀉入黃金卮
一杯入口壽千歲安用火棗并交梨不願青州覓從事
不願步兵為校尉但令喚鶴共呼鸞日日從君花下醉

春衣行送陶栗夫之杭

楊基孟載

春衣未著春風起紅白梅花似桃李江頭美人舟欲行
一幅雲帆挂春水吳江二月春水生江漚涓涓江草青
一雙玉壺不忍倒兩個黃鸝差可聽問君東行向何處

云向西湖水邊住蘓小門前野草花傷心不似當時路
當時湖上酒如川吳娃蕩漿歌可憐玉簫嫋裊鳴春雨
珠箔玲瓏卷暮煙百年佳麗空回首獨有參差路傍柳
無奈東風翡翠絲等閑摘向行人手君行先謁貢尚書
北斗之南一鉅儒聞說春闈選多士莫使諸生賦子虛
再謁杭州謝太守聲華已播羣公口豈無美政化蒼生
亦有新詩傳不朽苗軍寨中春草多楊公長騎白馬過
英雄既往行伍散吳兒至今能楚歌歌聲嗚咽悲未已

何趙劉楊相啖餌古來壯士爭相妬出乎爾者反乎爾
酒酣江亭望東粵吳郎霸圖今已歇斗牛中間落天星
十月烏臺雨飛血祇今三關方苦戰羽檄交馳急如箭
不是諸公英武姿嗟我蚩蚩命如線願君勿愁功與名
鄉里豎子咸公卿相逢未尚秦儀辯欲以空言致太平
空言呶呶何足補自有神模定中土世祖洪基億萬年
中興孰謂非光武蹇余一身苦飄泊未甘餓死填溝壑
平生不作兒女悲今日因君淚雙落摩挲淚眼為君舞

舟人為我槌大鼓家貧愧乏黃金贈欲別未別心最苦
陶郎陶郎爾今去後勿我悲我無羽翼相追隨人生窮
達自有命丈夫節義不可虧嗚呼丈夫節義不可虧眼
前富貴孰取為

陳公輔聽雨軒

吾衍子行

帝子吟瀟湘瀟湘雲煙竟茫茫楚客歌洞庭洞庭木葉
空秋聲豈如敬亭山前野人宅西風不驚響雲滴燭花
未剪書在床愛爾玄音起虛寂忽無復忽有天洒來自

然山中枕流人如聽洗耳泉神融意適有真趣汝南郭
泰來何莫忽憶隴頭水罷我膝上琴旅人動遐思無此
瀟洒心君不聞簷花悲歌杜陵老山雪空回剡溪棹祁
寒暑雨惟怨咨流麥漂衢竟誰道與君歌聽雨秋雨最
可聽明朝雨歇雲亦散月色滿地秋冥冥

望夫磯

劉致時中

望夫山頭日欲頽望夫山下江聲哀山頭日日風雨落
江上不見行人回空山亭亭幾朝莫猶記行人去時路

知君渡河長不歸恨不當年逐君去此身化作千仞磯
石猶可轉心不移長江水涸黃塵飛行人應有歸來時

送李公質之揚州

文質學古

海風吹秋秋無痕秋風洒落秋無魂樓船萬斛戛明月
怒濤駕空相吐吞隴西才人天上客古劍飛花溜新白
腰纏十萬何足云載詩未許揚州鶴揚州瓊花天下無
為我貰酒提胡盧醉來莫問江南侶豪氣逼人真丈夫

舟中夜歸

釋宗衍道原

夕風蕭蕭雲氣亂
篙子移舟頻觸岸
溪頭犬吠聲轉獐
沙際人歸暗相喚
兩三家村稍已近
十五里程纔過半
一星不出雨欲來
時復推蓬仰天看

題趙子昂畫馬歌

陳泰所安

九原駿骨埋地中
一夕盡化霜皮松
畫史剗松作神墨
埽出麒麟帶松骨
煙沙漠漠披風鬃
精氣炯炯房星同
天山無人草木白
西極日沒黃河東
時平使汝困轅軛
不得變化騰為龍
黃金擲送燕臺下
當日君王惜高價

自從汗血去人間老死英雄空見畫千年只說魏將軍
弟子韓幹終無聞今之畫者趙翰林嗚呼三晉賢子孫

汴京

董缺則裕

仙人一卷石片片民瘡痍皇城一坯土寸寸民膏脂古
人惜之如金珠取之盡銖鎰今人視之如沙泥棄之如
蓬茨古人不知今人嗤今人不知古人痴古人今人孰
是非山兮城兮竟何裨城有時而荒隳山有時而崩虧
山崩虧兮塵迷迷城荒隳兮草離離塵迷迷兮飛劫灰

草離離兮化隍池君不見日月爍樵牧移寒暑薄風雨
吹豈無一時好千載有餘悲嗚呼豈無一時好千載有
餘悲

乾坤清氣卷六